

重刊巢氏諸病源候總論卷之八

傷寒病諸候下

凡四十

四論

傷寒餘熱候

傷寒病其人或未發汗吐下或經服藥已後而脉  
洪大實數腹內脹滿小便赤黃大便難或煩或渴  
面色變赤此爲腑藏有結熱故也

傷寒五藏熱候

傷寒病其人先若身熱噤乾而渴飲水即心下滿  
洒淅身熱不得汗惡風時欬逆者此肺熱也若其  
人先苦身熱噤乾而小腹繞臍痛腹下滿狂言默

默惡風欲嘔者此肝熱也若其人先苦手掌心熱  
煩心欲嘔身熱心下滿口乾不能多飲目黃汗不  
出欲得寒水時妄笑者此心熱也若其人先苦身  
熱四支不舉足脛寒腹滿欲嘔而泄惡聞食臭者  
此脾熱也若其人先苦噤乾內熱連足脛腹滿大  
便難小便赤黃腰脊痛者此腎熱也

傷寒變成黃候

陽明病無汗小便不利心中懊憹必發黃若被火  
額上微汗出而但小便不利亦發黃其人狀變黃  
如橘色或如桃枝色腹微滿此由寒濕氣不散瘀

熱在於脾胃故也

傷寒心腹脹滿痛候

此由其人先患冷癖因發熱病服冷藥及飲冷水  
結在心下此為藏虛動於舊癖故也或吐下已後  
病不解内外有熱故心腹脹滿痛此為有實也

傷寒宿食不消候

此謂被下後六七日不大便煩熱不解腹滿而痛  
此為胃內有乾糞挾宿食故也或先患寒癖因有  
宿食又感於傷寒熱氣相搏故宿食不消

傷寒大便不通候



傷寒陽脉微而汗出少爲自始汗出多爲太過陽明脉實因發其汗汗出多者亦爲太過太過者陽氣絕於裏陽氣絕於裏則津液竭熱結在內故大便牢而不通也

傷寒小便不通候

傷寒發汗後而汗出不止津液少胃內極乾小腸有伏熱故小便不通

傷寒熱毒利候

此由表實裏虛熱氣乘虛而入攻於腸胃則下黃赤汁此熱毒所爲也

傷寒膿血利候

此由熱毒傷於腸胃故下膿血如魚腦或如爛肉汁壯熱而腸痛此濕毒氣盛故也

傷寒利候

傷寒病若表實裏虛熱乘虛而入攻於腸胃則下黃赤汁若濕毒氣盛則腹痛壯熱下膿血如魚腦如爛肉汁若寒毒入胃則腹滿身熱下清下清者不可攻其表汗出必脹滿表裏俱虛故也傷寒六七日不利更發熱而利者其人汗出不止者死但有陰無陽故也下利有微熱其人渴脉弱者今自

愈脉沈弱眩者下重其脉大者爲未止脉微數者爲欲自止雖發熱不臥少陰病八九日而身手足盡熱熱在膀胱必便血下利脉浮數尺中自滑其人必清膿血若利止惡寒而拳手足溫者可治也陽明病下利其脉浮大此皆爲虛弱強下之故傷寒下利日十餘行其脉反實死

傷寒病後胃氣不和利候

此由初受病時毒熱氣盛多服冷藥以自瀉下病折已後熱勢既退冷氣乃動故使心下愒牢噫噦食臭腹內雷鳴而泄利此由脾胃氣虛冷故也

傷寒上氣候

此由寒毒氣傷於太陰經也太陰者肺也肺主氣肺虛爲邪熱所客客則脹脹則上氣也

傷寒欬候

此由邪熱客於肺也上焦有熱其人必飲水水停心下則肺爲之浮肺主於欬水氣乘之故欬嗽

傷寒衄血候

傷寒病血衄者此由五藏熱結所爲也心主於血肝藏於血熱邪傷於心肝故衄血也衄者鼻血出也肺主於氣而開竅於鼻血隨氣行所以從鼻出



陽明病口燥但欲漱水不欲咽者必衄衄家不可  
攻其表汗出額上瀦急而緊直視而不能瞬不得  
眠亡血不可攻其表汗出則寒慄而振脉浮緊發  
熱其身無汗自衄者愈

傷寒吐血候

此由諸陽受邪熱初在表應發汗而汗不發致使  
熱毒入深結於五藏因有瘀積故吐血

傷寒陰陽毒候

夫欲辨陰陽毒病者始得病時可看手足指冷者  
是陰不冷者是陽若冷至一二三寸者病微若至

燥齒黃焦故大渴過經成壞病

傷寒百合候

百合病者謂無經絡百脉一宗悉致病也多因傷  
寒虛勞大病之後不平復變成斯疾也其狀意欲  
食復不能食常默默欲得卧復不得卧欲出行復  
不能行飲食或有美時或有不用飲時如強健人  
而卧不能行如有寒復如無寒如有熱復如無熱  
若小便赤黃百合之病諸藥不能治得藥即劇吐  
利如有神靈者身形如和其人脉微數每尿輒頭  
痛其病六十日不愈若尿頭不痛漸漸然者四十

八病源卷之八  
日愈若尿快然但眩者二十日愈體證或未病而預見或病四五日而出或病二十日一月微見其狀惡寒而嘔者病在上焦也二十三日當愈其狀腹滿微喘大便鞫三四日一大便時復小溏者病在中焦也六十三日當愈其狀小便淋瀝難者病在下焦也四十三日當愈各隨其證以治之耳

### 傷寒狐惑候

夫狐惑二病者是喉陰之爲病也初得狀如傷寒或因傷寒而變成斯病其狀默默欲眠目擊不得卧卧起不安蟲食於喉咽爲惑食於陰肛爲狐惡

飲食不欲聞食臭其人面目翕赤翕黑翕白食於上部其聲啞食於下部其咽乾此皆由濕毒氣所爲也

### 傷寒濕蠱候

凡得傷寒時氣熱病腹內有熱又人食少腸胃空虛三蟲行作求食食人五藏及下部蠱病之候齒無色舌上盡白甚者脣裏有瘡四支沈重忽忽喜眠如此皆爲蟲食其肛肛亂見五藏即死當數看其上脣內有瘡唾血脣內如粟瘡者則心內懊懣痛此蟲在上食其五藏下脣内生瘡者其人不寤



此蟲食下部皆能殺人

傷寒下部痛候

此由天腸偏虛毒氣衝於肛門故下部卒痛甚者痛如鳥啄

傷寒病後熱不除候

此謂病已間五藏尚虛客邪未散真氣不復故旦暮猶有餘熱如瘧狀此非真實但客熱也

傷寒病後渴候

此謂經發汗吐下已後府藏空虛津液竭絕腎家有餘熱故渴

傷寒病後不得眠候

夫衛氣晝行於陽夜行於陰陰主夜夜主卧謂陽氣盡陰氣盛則目瞑失令熱氣未散與諸陽并所以陽獨盛陰偏虛雖復病後仍不得眠者陰氣未復於本故也

傷寒病後虛羸候

其人血氣先虛復為虛邪所中發汗吐下之後經絡損傷陰陽竭絕熱邪始散真氣尚少五藏猶虛穀神未復無津液以榮養故虛羸而生病焉

傷寒病後不能食候



此由陽明太陰受病被下之後其熱已除而脾胃  
爲之虛冷穀氣未復故不能食也

傷寒病後虛汗候

夫諸陽在表陽氣虛則自汗心主於汗心藏偏虛  
故其液妄出也

傷寒內有瘀血候

夫人先瘀結在內因傷寒病若熱搏於久瘀則發  
熱如狂若有寒則小腹滿小便反利此爲血瘀宜  
下之其脉沈結者血證諦也

傷寒毒攻眼候

肝開竅於目肝氣虛熱乘虛上衝於目故目赤痛  
重者生瘡翳白膜息肉

傷寒毒攻足候

此由熱毒氣從內而出循經絡攻於足也人五藏  
六府并榮俞皆出於手足指故毒從臟腑而出

傷寒毒流腫候

人陰陽俱虛濕毒氣與風熱相搏則榮衛澀榮衛  
澀則血氣不散血氣不散則邪熱致壅隨其經絡  
所生而流腫也

傷寒病後脚氣候



此謂風毒濕氣滯於腎經腎主腰脚今腎既濕故脚弱而腫其人小腸有餘熱即小便不利則氣上脚弱而氣上故為脚氣也

傷寒病後霍亂候

霍亂吐下利止後更發熱傷寒其脉微溼本是霍亂今是傷寒却四五日至陰經上轉入陰當利本素嘔下利者不治若其人即欲大便但反失氣而不利是為更屬陽明心強二十二日愈所以然者經竟故也下後當強強能食者愈今反不能食到後經中頗能食復一經能食過之一日當愈若不

愈者不屬陽明也惡寒脉微而後利利止必亡血

傷寒病後瘧候

病後邪氣未散陰陽尚虛因為勞事致二氣交爭陰勝則發寒陽勝則發熱故寒熱往來有時休作而成瘧也

傷寒病後渴利候

此謂大渴飲水而小便多也其人先患勞損大病之後腎氣虛則熱熱乘之則腎燥腎燥則渴渴則引水腎虛則不能制水故飲水數升小便亦數升名曰渴利也



傷寒肺痿候

大發汗後因復下之則亡津液而小便反利者此爲上虛不能制於下也虛邪中於肺肺痿之病也欲欬而不能唾濁涎沫此爲肺萎之病也

傷寒失聲候

邪客於肺肺主聲而通於氣今外邪與真氣相搏真氣虛而邪氣勝故聲爲之不通也

傷寒夢泄精候

邪熱乘於腎則陰氣虛陰氣虛則夢交通腎藏精今腎虛不能制於精故因夢而泄

傷寒勞復候

傷寒病新瘥津液未復血氣尚虛若勞動早更復成病故勞復也若言語思慮則勞神梳頭澡洗則勞力勞則生熱熱氣乘虛還入經絡故復病也其脈緊者宜下之

傷寒病後食復候

傷寒病新瘥及大病之後脾胃尚虛穀氣未復若食猪肉腸血肥魚及炙膩物必大下利醫所不能治也必至於死若食餅糗黍飴脯炙鱸棗栗諸菓脯物及牢強難消之物胃氣虛弱不能消化必更



結熱適以藥下之則胃虛冷大利難禁不可下之  
必死下之亦危皆難救也大病之後多坐此死不  
慎護也夫病之新瘥後但得食糜粥寧少食乃飢  
慎勿飽不得他有所食雖思之勿與引日轉久可  
漸食羊肉糜若羹慎不可食猪狗等肉

傷寒病後令不復候

傷寒病後多因勞動不節飲食過度更發於病名  
之爲復復者謂復病如初也此由經絡尚虛血氣  
未實更致於病耳今預服藥及爲方法以防之故  
云令不復也

傷寒陰陽易候

陰陽易病者是男子婦人傷寒病新瘥未平復而  
與之交接得病者名爲陰陽易也其男子病新瘥  
未平復而婦人與之交接得病者名陽易其婦人  
得病新瘥未平復而男子與之交接得病者名陰  
易若二男二女並不相易所以呼爲易者陰陽相  
感動其毒度着如人之換易也其得病之狀身體  
熱衝胸頭重不能舉眼内生眵四支拘急小腹疔  
痛手足拳皆即死其亦有不即死者病苦小腹裏  
急熱上衝胸頭重不欲舉百節解離經脈緩弱氣



血虛骨髓空竭便怳怳吸吸氣力轉少著牀不能  
搖動起居仰人或引歲月方死

傷寒交接勞復候

夫傷寒病新瘥未滿百日氣力未平復而以房室  
者畧無不死也有得此病愈後六十日其人已能  
行射獵因而房室即吐涎而死病雖云瘥若未平  
復不可交接必小腹急痛手足拘拳二時之間亡  
范汪方云故督郵顧子獻得病已瘥未健詣華專  
視脉專曰雖瘥尚虛未平復陽氣不足勿爲勞事  
也能勞尚可女勞即死臨死當吐舌數寸獻婦聞

其瘥從百餘里來省之住數宿止交接之間三日  
死婦人傷寒雖瘥未滿百日氣血骨髓未牢實而  
合陰陽快者當時乃未即覺惡經日則令百節解  
離經絡緩弱氣血虛骨髓空竭便怳怳吸吸氣力  
不足著牀不能動搖起居仰人食如故是其證也  
丈夫亦然其新瘥虛熱未除而快意交接者皆即  
死若瘥後與童男交接者多不發復復者亦不必  
死

傷寒令不相染易候

傷寒之病但人有自觸冒寒毒之氣生病者此則



不熱着他人若因歲時不和溫涼失節人感其乖戾之氣而發病者此則多相染易故須預服藥及為方法以防之

重刊巢氏諸病源候論卷之八

重刊巢氏諸病源候論卷之九

時氣病諸候 凡四十三論

時氣候

時行病者是春時應暖而反寒夏時應熱而反冷秋時應涼而反熱冬時應寒而反溫非其時而有其氣是以一歲之中病無長少率相似者此則時行之氣也從春分後其中無暴大寒不冰雪而人有壯熱為病者此則屬春時陽氣發於冬時伏寒變為溫病也從春分以後至秋分節前天有暴寒者皆為時行寒症 名時行傷寒此是節候有



寒傷於人非觸冒

也若三月四月有暴寒其

時陽氣尚弱爲寒所折病熱猶小輕也五月六月陽氣已盛爲寒所折病熱則重也七月八月陽氣已衰爲寒所折病熱亦小微也其病與溫及暑病相似但治有殊耳然得時病一日在皮毛當摩膏火灸愈不解者二日法針服行解散汗出愈不解三日復發汗若大汗即愈不解止勿復發汗也四日服藜蘆丸微吐愈若病固藜蘆丸不吐者服赤豆瓜蒂散吐已解視病者尚未了者復一法針之當解不愈者六日熱已入胃乃與雞子湯下之

愈有無不如意但當諦視節度與病耳食不消病亦如時行俱發熱頭痛食病當速下之時病當待六七日下之時病始得一日在皮二日在膚三日在肌四日在胸五日入胃入胃乃可下也熱在胃外而下之熱承虛便入胃然病要當復下之不得下胃中餘熱置此爲病二死一生此輩不愈胃虛熱入胃爛微者赤斑出五死一生劇者黑斑出十死一生病人有強弱相倍也若得病無熱但狂言煩躁不安精神語言與人不相主當者勿以火迫但以猪苓散一方已上飲之以一升若升半



水可至二升益佳  
新汲井水強令飲之以指刺  
喉中吐之隨手愈不時吐者此病皆多不瘥勿以  
餘藥治也不相主當必危若此病不時以猪苓散  
吐解之者其殆速死亦可先以法針之尤佳以病  
者過日不以時得下之熱不得泄亦胃爛矣其湯  
熨針石別有正方補養宜導今附於後

**養生方** 引法云清旦初起以左右手交互從頭

上挽兩耳舉又引鬢髮即流通令頭不白耳不聾  
又摩手掌令熱以摩面從上下二七正去肝氣令  
面有光又摩手令熱令熱從體上下名曰乾浴令

人勝風寒時氣寒熱頭痛百病皆愈

時氣一日候

時氣病一日太陽受病太陽為三陽之首主於頭  
項故得病一日頭項腰脊痛

時氣二日候

時氣病二日陽明受病陽明主於肌肉其脈絡鼻  
入目故病二日內熱鼻乾不得眠夫諸陽在表始  
受病故可摩膏火灸發汗而愈

時氣三日候

時氣病三日少陽受病少陽脈循於膈上於頸耳



故得病三日胸脇耳聾也三陽經絡始相傳病未入於藏故可汗而愈

時氣四日候

時氣病四日太陰受病太陰爲三陰之首三日已後諸陽受病訖即傳之於陰太陰之脉主於喉噎故得病四日腹滿而噎乾其病在胸膈故可吐而愈也

時氣五日候

時氣病五日少陰受病少陰脉貫腎絡肺繫於舌故得病五日口熱舌乾而引飲其病在腹故可下

而愈

時氣六日候

時氣病六日厥陰受病厥陰脉循陰器絡於肝故得病六日煩滿而陰縮此爲三陰三陽俱受病毒氣入於腸胃故可下而愈

時氣七日候

時氣病七日法當小愈所以然者陰陽諸經傳病竟故也今病不除者欲爲再經病也再經病者謂經絡重受病也

時氣八九日已上候



時氣病八九日已上不解者或是諸經絡重受於病或已發汗吐下之後毒氣未盡所以病不能除或一經受病未即相傳致使停滯累日病證不改者故皆當察其證候而治之

### 時氣取吐候

夫得病四日毒在胸膈故宜取吐有得病二三日便心胸煩滿此為毒氣已入或有五六日已上毒氣猶在上焦者其人有痰實故也所以復宜取吐也

### 時氣煩候

夫時氣病陰氣少陽氣多故身熱而煩其毒氣在於心而煩者則令人悶而欲嘔若其人胃內有燥糞而煩者則謬語時繞臍痛腹為之滿皆當察其證候也

### 時氣狂言候

夫病甚則棄衣而走登高而歌或至不食數日踰垣上屋所上非其素時所能也病反能者皆陰陽爭而外並於陽四支者諸陽之本也邪盛則四支實實則能登高而歌熱盛於身故棄衣而走陽盛故妄言罵詈不避親戚大熱遍身狂言而妄見妄



聞之

時氣嘔候

胃家有熱穀氣入胃與熱相并氣逆則嘔或吐下後飲食多胃虛冷亦爲嘔也

時氣乾嘔候

熱氣在於脾胃或發汗解後或大下之後胃內不和尚有蓄熱熱氣上熏故心煩而嘔也

時氣噦候

伏熱在胃令人胸滿則氣逆氣逆則噦若大下後胃氣虛冷亦令致噦也

時氣嗽候

熱邪客於肺上焦有熱其人必飲水入傳心下則上乘於肺故上氣而嗽也

時氣渴候

熱氣入於胃藏腎惡燥熱氣盛則腎燥腎燥故渴而引飲也

時氣衄血候

時氣衄血者五臟熱結所爲心主於血邪熱中於手少陰之經客於足陽明之絡故衄血也衄者血從鼻出也



時氣吐血候

諸陽受病不發其汗熱毒入深結在五臟內有瘀血積故令吐血也

時氣口瘡候

發汗下後衰裏俱虛而毒氣未盡熏於上焦故喉口生瘡也

時氣喉咽痛候

陰陽隔絕邪客於足少陰之絡毒氣上熏攻於咽喉故痛或生瘡也

時氣發斑候

夫熱病在表已發汗未解或吐下後熱毒氣不散煩躁謬言語此爲表虛裏實熱氣躁於外故身體發斑如錦文凡發斑不可用發表藥令瘡開泄更增斑爛表虛故也

時氣毒攻眼候

肝開竅於目肝氣虛熱毒乘虛上衝於目故赤痛或生翳赤白膜息肉及瘡也

時氣毒攻手足候

熱毒氣從藏府出攻於手足手足則焮熱赤腫疼痛也人五藏六府并榮俞皆出於手足指故此毒

從內而出也

時氣炮瘡候

夫表虛裏實熱毒內盛則多發炮瘡重者周布遍身其狀如火瘡若根赤頭白者則毒輕若色紫黑則毒重其瘡形如登豆亦名登豆瘡

時氣瘡瘡候

夫病新瘡血氣未復皮膚尚虛踈而觸冒風日則徧體起細瘡瘡痒如癬疥狀名為逸風

時氣蠶候

毒氣結在腹內穀氣衰毒氣盛三蟲動作食人五

臟多令洩利下部瘡痒若脣內生瘡但欲寐者此  
蠶食  
重者肛爛見五藏也

時氣利候

此由熱氣在於腹胃挾毒則下黃赤汁也

時氣膿血利候

此由熱傷於腸胃故下膿血如魚腦或如爛肉汁  
壯熱而腹疔痛此濕毒氣所為也

時氣墮利候

夫熱蓄在藏多令人下利若毒氣盛則變膿血因  
而成蠶蠶者蟲食人五藏及下部也若食下部則



今穀道生瘡而下利名爲蠶利若但生瘡而不利者爲蠶也

時氣大便不通候

此由脾胃有熱發汗太過則津液竭津液竭則胃乾結熱在內大便不通也

時氣小便不通候

此由汗後津液虛少其人小腸有伏熱故小便不通也

時氣陰陽毒候

此謂陰陽二氣偏虛則受於毒若病身重腰脊痛

煩悶面赤斑出咽喉痛或下利狂走此爲陽毒若身重背強短氣嘔逆脣青面黑四支逆冷爲陰毒或得病數日變成毒者或初得病便有毒者皆宜依證急治失候則殺人

時氣變成黃候

夫時氣病濕毒氣盛蓄於脾胃脾胃有熱則新穀鬱蒸不能消化大小便結澀故令身面變黃或如橘柚或如桃枝色

時氣變成瘡候

病後邪氣未散陰陽尚虛因爲勞事致二氣交爭

陰勝則發寒陽勝則發熱故令寒熱往來有時休作而成瘧

時氣敗候

此謂病後餘毒未盡形證變轉久而不瘥陰陽無復綱紀名爲敗病

時氣勞復候

夫病新瘥者血氣尚虛津液未復因即勞動更成病焉若言語思慮則勞於神梳頭澡洗則勞於力未堪勞而強勞之則生熱熱氣還經絡復爲病者名曰勞復

時氣食復候

夫病新瘥者脾胃尚虛穀氣未復若即食肥肉魚鱠餅餌棗栗之屬則未能消化停積在於腸胃使脹滿結實因更發熱復爲病者名曰食復也

時氣病瘥後交接勞復候

夫病新瘥者陰陽二氣未和早合房室則令人陰腫入腹腹內疝痛名爲交接勞復

時氣病後陰陽易候

陰陽易病者是男子婦人時氣病新瘥未平復而與之交接得病者名陰陽易也其男子病新瘥未



平復而婦人與之交接得病者名曰陽易其婦人  
得病新瘥未平復而男子與之交接得病者名曰  
陰易若二男二女並不相易所以呼爲易者陰陽  
相感動其毒度著於人如換易也其病之狀身體  
熱衝胸頭重不能舉眼中生眵四支拘急小腹疔  
痛手足拳皆即死其亦有不即死者痲苦小腹裏  
急熱氣上衝胸頭重不欲舉有節解離經脈緩弱  
氣血虛骨髓竭使怳怳吸吸氣力轉少着牀不能  
搖動起居仰人或引歲月方死

時氣病後虛羸候

夫人榮衛先虛復爲邪熱所中發汗吐下之後經  
絡損傷陰陽竭絕虛邪始散真氣尚少五藏猶虛  
穀神未復無津液以榮養故虛羸而生衆病焉

時氣陰壅腫候

此由腎臟虛所致腎氣通於陰今腎爲熱邪所傷  
毒氣下流故今陰腫

時氣今不相染易候

夫時氣病者此皆因歲時不和溫涼失節人感乖  
戾之氣而生病者多相染易故預服藥及爲方法  
以防之

熱病諸候

凡二十八論

熱病候

熱病者傷寒之類也冬傷於寒至春變為溫病夏變為暑病暑病重於溫肝熱病者小便先黃腹  
痛多卧身熱熱爭則狂言及驚脇滿痛手足躁不  
安卧庚辛甚甲乙大汗氣逆則庚辛死心熱病者  
先不樂數日乃熱熱爭則卒心痛煩寃善嘔頭痛  
面赤無汗至壬癸甚丙丁大汗氣逆則壬癸死脾  
熱病者先頭重頰痛煩心欲嘔身熱熱爭則腰痛  
腹滿泄兩頰痛甲乙甚戊己大汗氣逆則甲乙死

肺熱病者先浙然起毛惡風舌上黃身熱熱爭則  
喘咳痺走胸應背不得大息頭痛不甚汗出而寒  
丙丁甚庚辛大汗氣逆則丙丁死腎熱病者先腰  
痛脛酸苦渴數飲身熱熱爭則項痛而強脛寒骨  
且酸足下熱不欲言其項痛淖澹戊己甚壬癸大  
汗氣逆則戊己死肝熱病者左頰先赤心熱病者  
額先赤脾熱病者鼻先赤肺熱病者右頰先赤腎  
熱病者頤先赤凡病雖未發見其赤色者刺之名  
曰治未病一日汗不出大瀉發者死二日泄而腹  
滿甚者死三日目不明熱不已者死四日老人嬰



兒熱而腹滿者死五日汗不出嘔血者死六日古  
本爛熱不已者死七日欬血衄血汗不出出不至  
足者死八日髓熱者死九日熱而瘕者死凡此者  
不可刺也熱病已得汗而脉尚躁盛此陰脉之極  
也死其得汗而脉靜者生熱病者脉常盛躁而不  
得汗者此陽脉之極也死脉盛躁得汗者生熱病  
七八日脉微小病者瘦血口中乾一日半死脉代  
一日死熱病已得汗脉尚數躁而喘且復熱勿庸  
刺喘甚者死熱病七八日脉不躁躁不數後三日  
中有汗三日不汗四日死未常汗者勿庸刺也診

人熱病七八日其脉微小口乾脉代舌焦黑者死  
診人熱病七八日脉不數不喘者當瘥之後三日  
温汗不出者死熱病已得汗當熱不去者亦死不  
治也脉靜安者生脉躁者難治脉常躁靜此氣之  
極亦死也腹鞞常喘而熱不退者死多汗脉虛小  
者生鞞實者死養生方云三月勿食陳葢必遭熱  
病

熱病一日候

熱病一日病在太陽太陽主表表謂皮膚也病在  
皮膚之間故頭項腰脊疼痛

熱病二日候

熱病二日陽明受病病在肌肉故肉熱鼻乾不得眠故可摩膏火灸發汗而愈

熱病三日候

熱病三日諸陽相傳病訖病猶在表未入於臟故胸脇熱而耳聾故可發汗而愈

熱病四日候

熱病四日太陰受病太陰者三陰之首也三陽受病訖傳入於陰故毒氣已入胸膈其病喉乾腹滿故可吐而愈

熱病五日候

熱病五日少陰受病毒氣入腹內其病口舌乾而引飲故下而愈

熱病六日候

熱病六日厥陰受病毒氣入腸胃其人煩滿而陰縮故可下而愈

熱病七日候

熱病七日三陰三陽傳病訖病法當愈今病不除者欲為再經病也再經者謂經絡重受病也

熱病八九日已上候



熱病八九日已上不解者皆由毒氣未盡所以病證不除也

熱病解肌發汗候

此謂得病三日已還病法在表故宜發汗或病已經五六日然其人喉口不焦乾心腹不滿又不引飲但頭痛身體壯熱脉洪大者此爲病證在表未入於藏故雖五六日猶須解肌發汗不可苟依日數輒取吐下

熱病煩候

此由陽勝於陰熱氣獨盛否結於藏則三焦隔絕

故身熱而煩也

熱病飽瘡候

夫熱病飽瘡者此由表虛裏實熱氣盛則發瘡重者周布遍身若瘡色赤頭白則毒輕色紫黑則毒重其形如登豆故名登豆瘡

熱病斑瘡候

夫病在表或未發汗或已發汗吐下後表證未解毒氣不散煩熱而渴渴而不能飲表虛裏實故身體發斑如錦文

熱病熱瘡候

人藏府虛實不調則生於客熱表有風濕與熱氣相搏則身體生瘡疼痛而膿汁出甚者一差一劇此風熱所為也

熱病口瘡候

此由脾藏有熱衝於上焦故口生瘡也

熱病咽喉瘡候

上實下虛熱氣內盛熏於咽喉故生瘡也

熱病大便不通候

夫經發汗出多則津液少津液少則胃乾結熱在胃所以大便不通又有肝藏自生於熱者此由

三焦否隔脾胃不和蓄熱在內亦大便不通也

熱病小便不通候

熱在膀胱流於小腸熱盛則脾胃乾津液少故小便不通也

熱病下利候

熱氣攻於腸胃胃虛則下赤黃汁挾毒則成膿血

熱病暈候

熱氣攻於腸胃則穀氣衰所以三蟲動作食人五臟及下部重者肛爛見府藏

熱病毒攻眼候



肝藏開竅於目肝氣虛熱毒乘虛則上衝於目重  
者生瘡翳及赤白膜也

熱病毒攻手足候

夫熱病攻手足及人五藏六府并榮俞皆出於手  
足指今毒氣從府藏而出循於經絡攻於手足故  
手足指皆腫亦焮痛也

熱病嘔候

胃內有熱則穀氣不和新穀入胃與熱氣相搏胃  
氣不平故嘔或吐下已後臟虛亦令嘔也

熱病噦候

伏熱在胃則令人胸滿胸滿則氣逆氣逆則噦若  
大下已後飲水多胃內虛冷亦令噦也

熱病口乾候

此由五藏有虛熱脾胃不和津液竭少故口乾也

熱病衄候

心藏傷熱所爲也心主血肺主氣開竅於鼻邪熱  
與血氣并故衄也衄者血從鼻出也

熱病勞復候

夫熱病新瘥津液未復血氣尚虛因勞動早勞則  
生熱熱氣乘虛還入經絡故復病也

熱病後沈滯候

凡病新瘥後食猪肉及腸血肥魚脂膩必大下利  
醫所不能復治也必至於死若食餅餌案餈哺炙  
膾棗栗諸菓物肺及牢實難消之物胃氣尚虛弱  
不能消化必結熱復病還以藥下之

重刊巢氏諸病源候總論卷之九

重刊巢氏諸病源候總論卷之十

溫病諸候 凡三十四論

溫病候

經言春氣溫和夏氣暑熱秋氣清涼冬氣冰寒此  
四時正氣之序也冬時嚴寒萬類深藏君子固密  
則不傷於寒觸冒之者乃為傷耳其傷於四時之  
氣皆能為病而以傷寒為毒者以其最為殺厲之  
氣焉即病者為傷寒不即病者為寒毒藏於肌骨  
中至春變為溫病是以辛苦之人春夏必有溫病  
者皆由其冬時觸冒之所致也凡病傷寒而成溫



者先夏至日者爲病溫後夏至日者爲病暑其冬復有非節之暖名爲冬溫毒與傷寒大異也有病溫者汗出輒復熱而脉躁病不爲汗衰狂言不能食病名爲何也曰病名曰陰陽交陰陽交者死人所以汗出者皆生於穀穀生於精今邪氣交爭於骨肉之間而得汗者是邪却而精勝則當食而不復熱熱者邪氣也汗者精氣也今汗出而輒復熱者是邪勝也汗出而脉尚躁盛者死今脉不與汗相應此不稱其病也其死明矣狂言者是失志失志者死今見三死不見一生雖愈必死凡皮膚熱

甚脉盛躁者病溫也其脉盛而滑者汗且出也凡溫病人二三日身軀熱脉疾頭痛食飲如故脉直疾八日死四五日頭痛脉疾喜吐脉來細十二日死此病不治八九日脉不疾身不痛目不赤色不變而反利脉來牒牒按不彈手時大心下鞣十七日死病三四日以下不得汗脉大疾者生脉細小難得者死不治也下利腹中痛甚者死不治其湯熨針石別有正方存神攘辟今附於後

**養正方導引法**云常以雞鳴時存心念四海神名三遍辟百邪止鬼令人不病

東海神名阿明

南海神名祝融

西海神名巨象

北海神名禺強

又存念心氣赤肝氣青肺氣白脾氣黃腎氣黑  
出周其身又兼辟邪鬼欲辟却眾邪百鬼常存心  
爲炎火如斗煌煌光明則有邪不敢干之可以入  
温疫之中

温病一日候

温病一日太陽受病諸陽主表表謂皮膚也病在  
皮膚之間故頭項腰脊痛

温病二日候

温病二日陽明受病病在於肌肉故肉熱鼻乾不  
得眠故可摩膏火灸發汗而愈

温病三日候

温病三日少陽受病故胸脇熱而耳聾三陽始傳  
病訖未入於藏故可發汗而愈

温病四日候

温病四日太陰受病太陰者三陰之首也三陽受  
病訖傳入於陰故毒氣入胸膈之內其病咽乾腹  
滿故可吐而愈

温病五日候



溫病五日少陰受病毒氣入腹其病口熟舌乾而引飲故可下而愈

溫病六日候

溫病六日厥陰受病毒氣入腹胃其病煩滿而陰縮故可下而愈

溫病七日候

溫病七日病法當愈此是三陰三陽傳病竟故也今七日病不除者欲爲再經病也再經病者是經絡重受病也

溫病八日候

溫病八日已上病不解者或是諸經絡重受於病或經發汗吐下之後毒氣未盡所以病證不罷也

溫病九日已上候

溫病九日已上病不除者或初一經受病即不能相傳或已傳三陽訖而不能傳於三陰所以停滯累日病證不罷皆由毒氣未盡表裏受邪經絡損傷府藏俱病也

溫病發斑候

夫人冬月觸冒寒毒者至春始發病初在表或已發汗吐下而表證未罷毒氣不散故發斑瘡又

冬月天時溫暖人感乖戾之氣未即發病至春又被積寒所折毒氣不得發泄至夏遇熱溫毒始發出於肌膚斑爛隱軫如錦文也

溫病煩候

此由陰氣少陽氣多故身熱而煩其毒氣在於心府而煩者則令人悶而欲嘔若其胃內有燥糞而煩者則謬語而繞臍痛也

溫病狂言候

夫病甚則棄衣而走登高而歌或至不食數日踰垣上屋所上非其素時所能也病反能者皆陰陽

爭而外并於陽四支者諸陽之本也邪盛則四支實實則能登高而歌熱盛於身故棄衣而走陽盛故妄言罵詈不避親戚大熱逾身狂言而妄聞視也

溫病嗽候

邪熱客於胸府上焦有熱其人必飲水水停心下則上乘於肺故令嗽

溫病嘔候

胃中有熱穀氣入胃與熱相并氣逆則嘔或吐下後飲水多胃虛冷亦爲嘔也



温病噦候

伏熱在胃令人胸滿胸滿則氣逆氣逆則噦若大下後胃氣虛冷亦令致噦

温病渴候

熱氣入於腎藏腎藏惡燥熱盛則腎燥腎燥則渴引飲

温病取吐候

温病熱發四日病在胸膈當吐之愈有得病一二日便心胸煩滿爲毒已入兼有痰實亦吐之

温病變成黃候

發汗不解温毒氣瘀結在胃小便爲之不利故變成黃身如橘色

温病咽喉痛候

熱毒在於胸府三焦隔絕邪客於足少陰之絡下部腫不通熱氣上攻咽喉故痛或生瘡也

温病毒攻眼候

肝開竅於目肝氣虛熱乘虛上衝於目故赤痛重者生瘡翳也

温病衄候

由五藏熱結所爲心主血肺主氣而開竅於鼻邪

熱傷於心故衄者血從鼻出也

溫病吐血候

諸陽受邪熱初在表應發汗而不發致熱毒入深結於五藏內有瘀血積故吐血也

溫病下利候

風熱入於腸胃故令洞泄若挾毒則下黃赤才及膿血

溫病膿血利候

熱毒甚者傷於腸胃故下膿血如魚腦或如爛肉汁此由溫毒氣盛故也

溫病大便不通候

脾胃有積熱發汗太過則津液少使胃乾結熱在內故大便不通

溫病小便不通候

發汗後津液少膀胱有結熱移入於小腸故小便不通也

溫病下部瘡候

熱攻腸胃毒氣既盛穀氣漸衰故三蟲動作食入五藏則下部生瘡重者肛爛見府藏

溫病勞復候



謂病新瘥津液未復血氣尚虛因勞動早更生於  
熱熱氣還入經絡復成病也

温病食復候

凡得温毒病新瘥脾胃尚虛穀氣未復若食大猪  
羊肉并腸血及肥魚炙脂膩食此必大下利下利  
則不可復救又禁食餅餌炙膾棗栗諸生菓難消  
物則不能消化停積在於腸胃便脹滿結實大小  
便不通因更發熱復成病也非但雜食梳頭洗浴  
諸勞事等皆須慎之

温病陰陽易候

陰陽易病者是男子婦人温病新瘥未平復而與  
之交接因得病者名爲陰陽易也其男子病新瘥  
未平復而婦人與之交接得病者名陽易其婦人  
得病雖瘥未平復男子與之交接得病者名陰易  
若二男二女並不自相易所以呼爲易者陰陽相  
感動其毒度著於人如換易也其病之狀身體熱  
衝胸頭重不舉眼中生暎四支拘急小腹疔痛手  
足拳臂即死其亦有即不死者痛苦小腹裏急熱  
上衝胸頭重不欲舉百節解離經脈緩弱氣血虛  
骨髓竭便怏怏吸吸氣力轉少著牀不能搖動起

居仰人或引歲月方歿

溫病交接勞復候

病雖瘥陰陽未和因早房室令人陰腫縮入腹腹  
疔痛名爲交接之勞復也

溫病瘥後諸病候

謂其人先有宿疾或患虛勞風冷積聚寒疝等疾  
因溫熱病發汗吐下之後熱邪雖退而血氣損傷  
府藏皆虛故因茲而生諸病

溫病令人不相染易候

此病皆因歲時不和溫涼失節人感乖戾之氣而

生病則病氣轉相染易乃至滅門延及外人故須  
預服藥及爲法術以防之

疫癘病諸候

凡三論

疫癘病候

其病與時氣溫熱等病相類皆由一歲之內節氣  
不和寒暑乖候或有暴風疾雨霧露不散則民多  
疾疫病無長少率皆相似如有鬼厲之氣故云疫  
癘病

**卷之六** 封君達常乘青牛魯女生常乘駁牛孟  
子綽常乘駁馬尹公度常乘青驛時人莫知其名



字爲誰故曰欲得不死當問青牛道士欲得此色  
駁牛爲上青牛次之駁馬又次之三色者順生之  
氣也云古之青牛者乃栢木之精也駁牛者古之  
神宗之先也駁馬者乃神龍之祖也云道士乘此  
以行於路百物之惡精疫氣之癘鬼將長揖之焉  
延年之道存念心氣赤肝氣青肺氣白脾氣黃腎  
氣黑出周其身又無辟邪鬼欲辟却衆邪百鬼常  
存心爲炎火如斗煌煌光明則百邪不敢干之可  
以入温疫之中

疫癘炮瘡候

熱毒盛則生炮瘡瘡周布遍身狀如火瘡色赤頭  
白者毒輕色黑紫黯者毒重亦名爲蠶豆瘡

瘴氣候

夫嶺南青草黃芒瘴猶如嶺北傷寒也南地暖故  
太陰之時草木不黃落伏蟄不閉藏雜毒因暖而  
生故嶺南從仲春訖仲夏行青草

重刊巢氏諸病源候總論卷之十一

瘧病諸候

凡十四論

瘧病候

夏日傷暑秋必病瘧瘧之發以時者此是邪客於風府循脊而下衛氣一日一夜常大會於風府其明日下一節故其作則膝理開膝理開則邪氣入邪氣入則病作此所以日作常晏也衛氣之行風府日下一節二十一日下至尾骶二十二日入脊內注於伏衝伏衝脉其行九日出於缺盆之中其氣既上故其病稍早發其間日發者由邪氣內薄



五藏橫連募原其道遠其氣深其行遲不能日作  
故間日蓄積乃作夫衛氣每至於風府腠理而開  
開則邪入焉其衛氣日下一節則不當風府奈何  
然風府無常衛氣之所應必開其腠理氣之所舍  
則其病已風之與瘧也相與同類而風獨常在也  
而瘧特以時休何也由風氣留其處瘧氣隨經絡  
沈以內薄故衛氣應乃作陽當陷而不陷陰當升  
而不升爲邪所中陽遇邪則捲陰遇邪則緊捲則  
惡寒緊則爲慄寒慄相薄故名瘧弱乃發熱浮乃  
來出旦中旦發暮中暮發夫瘧其人形瘦皮必慄

問曰病瘧以月一日發當以十五日愈設不愈月  
盡解

足太陽瘧令人腰痛頭重寒從背起先寒後熱渴  
渴然後熱止汗而出難已刺郄中出血

足少陽瘧令人身體解倦寒不甚熱不甚惡見人  
見人心惕惕然熱多汗出其刺足少陽

足陽明瘧令人先寒洒淅洒淅寒甚久乃熱熱去  
汗出喜見日光火氣乃快然刺足陽明腓上

足太陰瘧令人不樂好太息不嗜食多寒熱汗出  
病至則善嘔嘔已乃栗即取之

足少陰瘧令人吐嘔甚久寒熱多寒少欲閉戶而處其病難止

已厥陰瘧令人腰痛少腹滿小便不利如癢非癢狀也數小便意恐懼氣不足腸中悒悒刺足厥陰肺瘧者令人心寒寒甚熱間善驚如有見者刺

手太陰陽明

心瘧者令人煩心甚欲得清水乃寒甚熱不甚熱

刺手少陰

肝瘧令人色蒼蒼然太息甚狀若死者刺足厥陰見血

脾瘧者令人疾寒腹中痛熱則腸中鳴已汗出刺足太陰

腎瘧令人洒洒腰脊痛宛轉大便難目眴眴然手足寒刺足太陽少陰

胃瘧令人且病也善飢而不能食食而支滿腹大刺足陽明太陰橫脉出血

肺病爲瘧乍來乍去令人心寒寒甚則熱發善驚如有所見此肺瘧證也若人本來語聲雄恍惚爾不亮拖氣用力方得出言而反於常人呼共語直視不應雖曰未病勢當不久此即肺病聲之候也



察觀疾表裏相應依源審治乃不失也

心病爲瘧者令人心煩其病欲飲清水多寒少熱若人本來心性相雅而急卒反於常倫或言未竟便住以手剔脚爪此人必死禍雖未及呼曰行尸此心病聲之候也虛則補之實則瀉之不可治者明而察之肝病爲瘧者令人色蒼蒼然氣息喘悶戰掉狀如死者若人本來少於悲患忽爾嗔怒出言反常乍寬乍急言未竟以手向眼如有所思若不即病禍必至矣此肝病聲之證也其人若虛則爲寒風所傷若實則爲熱氣所損陽則瀉之陰則

補之

脾病爲瘧者令人寒腹中痛腸中鳴鳴已汗出若其人本來少於喜怒而忽反常喜無度正言鼻笑不答於人此是脾病聲之候證不盈旬月禍必至也

腎病爲瘧者令人悽悽然腰脊痛而宛轉大便澀自掉不定手足而寒若人本來不喜不怒忽然審而好瞋怒反於常性此腎已傷雖未發覺是其候也見人未言而前開口笑還閉口不聲舉手柵腹此是腎病聲之證虛實表裏浮沉清濁宜以察之

逐以治之夫瘧脉者自弦弦數多熱弦遲多寒弦  
小緊者可下之弦遲者溫藥已脉數而緊者可發  
其汗宜針灸之脉浮大者不可針灸可吐之凡瘧  
先發如食頃乃可以治之過之則失時

溫瘧候

夫溫瘧與寒瘧安舍溫瘧者得之冬中於風寒寒  
氣藏於骨髓之中至春則陽氣大發邪氣不能出  
因遇大暑腦髓燥脉肉消釋腠理發泄因有所用  
力邪氣與汗偕出此病藏於腎其氣先從內出之  
於外如此則陰虛而陽盛則病衰則氣復反入

則陽虛陽虛則寒矣故先熱而後寒名曰溫瘧  
瘧先寒而後熱此由夏傷於暑汗大出腠理開發  
因遇夏氣淒滄之水寒藏於腠理皮膚之中  
秋傷於風則病成矣夫寒者陰氣也風者陽氣  
也先傷於寒而後傷於風故先寒而後熱先傷於  
風而後傷於寒故先熱而後寒亦以時作名曰溫  
瘧夫病瘧六七日但見熱者溫瘧矣

瘧瘧候

夫瘧瘧者夏傷於暑也其病秋則寒甚冬則寒輕  
春則惡風夏則多汗者然其蓄作有時以瘧之始

發先起於毫毛伸欠乃作寒慄鼓頷腰痛寒去則外內皆熱頭痛而渴欲飲何氣使然此陰陽上下交爭虛實更作陰陽相移也陽並於陰則陰實陽虛陽明虛則寒慄鼓頷巨陽虛則腰背頭痛三陽俱虛陰氣勝勝則骨寒而痛寒生於內故中外皆寒陽盛則外熱陰虛則內熱內外皆熱則喘而渴欲飲此得之夏傷於暑熱氣盛藏之於皮膚之間腸胃之外此榮氣之所舍此令汗出空踈腠理開因得秋氣汗出遇風乃得之也  
浴水氣舍於皮膚之內與衛氣并居衛氣者  
行陽此氣

得陽如外出得陰如內薄是以日作其間日而作者謂其氣之舍深內薄於陰陽氣獨發陰邪內著陰與陽爭不得出是以間日而作

### 間日瘧候

此由邪氣與衛氣俱行於六府而有時相失不相得故邪氣內薄五藏則道遠氣深故其行遲不能與衛氣偕出是以間日而作也

### 風瘧候

夫瘧皆生於風風者陽氣也陽主熱故衛氣每至於風府則腠理開開則邪入邪入則病作先傷於



風故發熱而後寒慄

痺瘧候

夫痺瘧者肺素有熱氣盛於身厥逆上衝中氣實而不外泄因有所用力腠理開風寒舍於皮膚之內分肉之間而發發則陽氣盛陽氣盛而不衰則病矣其氣不及於陰故但熱而不寒寒氣內藏於心而外舍分肉之間令人消鑠肌肉故命曰痺瘧其狀但熱不寒陰氣先絕陽氣獨發則少氣煩恍手足熱而嘔也

山瘴瘧候

此病生於嶺南帶山瘴之氣其狀發寒熱休作有時皆由山溪源嶺嶂濕毒氣故也其病重於傷暑之瘧

痰實瘧候

痰實瘧者謂患人胸膈先有停痰結實因成瘧病則令人心下脹滿氣逆煩嘔也

寒熱瘧候

夫瘧者風寒之氣也邪并於陰則寒并於陽則熱故發作皆寒熱也

往來寒熱瘧候

此由寒氣并於陰則發寒風氣并於陽則發熱陰陽二氣更實更虛故寒熱更往來也

寒瘧候

此由陰陽相并陽虛則陰勝陰勝則寒寒發於內而并於外所以內外俱寒故病發但戰慄而鼓頤願也

勞瘧候

凡瘧積久不瘥者則表裏俱虛客邪未散真氣不復故疾雖暫間小勞便發

發作無時瘧候

夫衛氣一日一夜大會於風府則腠理開則邪入邪入則病作當其時陰陽相并隨其所勝故生寒熱故動作皆有早晏者若府藏受邪內外失守邪氣妄行所以休作無時也

又瘧候

夫瘧皆由傷暑及傷風所為熱盛之時發汗吐下過度府藏空虛榮衛傷損邪氣伏藏所以引日不瘥仍故休作也夫瘧歲歲發至三歲發連月發不解脇下有否治之不得攻其否但得虛其津液先其時發其汗服湯已先小寒者引衣自溫覆汗出

小便自引利即愈也

重刊巢氏諸病源候總論卷之十二

黃病諸候 凡二十八論

黃病候

黃病者一身盡疼發熱面赤洞黃七八日後壯熱口裏有血當下之法如他肝狀其人少腹內急若其人眼睛澀疼鼻骨疼兩膊及項強腰背急即是患黃多大便澀但令得小便快即不慮死不用大便多多即心腹脹不存此由寒濕在表則熱畜於脾胃腠理不開瘀熱與宿穀相搏煩鬱不得消則大小便不通故身體面目皆變黃色凡黃候其寸



口近掌無脉口鼻冷氣並不可治也

### 急黃候

脾胃有熱穀氣鬱蒸因爲熱毒所加故卒然發黃心滿氣喘命在頃刻故云急黃也有得病即身體面目發黃者有初不知是黃死後乃身面黃者其候得病但發熱心戰者是急黃也

### 黃汗候

黃汗之爲病身體洪腫發熱汗出不渴狀如風水汗染衣正黃如藥汁其脉自沈此由脾胃有熱汗出而入水中浴若水入汗孔中得成黃汗也

### 犯黃候

有得黃病已瘥而將息失宜飲食過度犯觸禁忌致病發胃名爲犯黃候

### 勞黃候

脾藏中風風與痰熱相搏故令身體發黃額上黑微汗出手足中熱薄暮發勝眊急四支煩小便自利名爲勞黃

### 腦黃候

熱邪在骨髓而腦爲髓海故熱氣從骨髓流入於腦則身體發黃頭腦痛眉疼名爲腦黃候

陰黃候

陽氣伏陰氣盛熱毒加之故但身面色黃頭痛而不發熱名爲陰黃

內黃候

熱毒氣在脾胃與穀氣相搏熱蒸在內不得宣散先心腹脹滿氣急然後身面悉黃名爲內黃

行黃候

瘀熱在脾藏但肉微黃而身不甚熱其人頭痛心煩不廢行立名爲行黃

辯黃候

氣水飲停滯結聚成癍因熱氣相搏則鬱蒸不散故脇下滿痛而身發黃名爲癍黃

噤黃候

心脾二藏有瘀熱所爲心主於舌脾之絡脉出於舌下若身面發黃舌下大脉起青黑色舌噤強不能語名爲噤黃也

五色黃候

凡人著黃五種黃皆同其人至困冥漠不知東西者看其左手脉名手肝脉兩筋中其脉如有如無又看近手屈肘前臂上當有三歧脉中央者名爲

手肝脉兩廂者名歧脉看時若肝脉全無兩廂壞其人十死一生難可救濟若中央脉近掌三指道有知不絕其人必不死脉經三日漸微至手掌必得汗汗罷必愈婦人患黃看右手脉眼青黃視其瞳子青脉亦青面色青者是其由脾移熱於肝肝色青也其人身熱而發黃赤視其眼赤高視心腹脹滿脉赤便是此由脾移熱於心心色赤故其人身熱而發赤黃不可治治之難差其人身熱發黃白視其舌下白垢生者是由脾移熱於肺肺色白也其人身熱發黑黃視其腎黑眼黃舌下脉黑

者是由脾移熱於腎腎色黑也故其身熱而發黃也

### 風黃候

凡人先患風濕復遇冷氣相搏則舉身疼痛發熱而體黃也

### 因黃發血候

此由脾胃大熱熱傷於心主於血熱氣盛故發黃而動熱故因名為發血

### 因黃發痢候

此由瘧熱在於脾胃因而發黃挾毒即下痢故名



爲發痢

因黃發痔候

此病由熱傷於心主血熱盛則血隨大便而下名爲血痔

因黃發癰候

夫黃病皆是大熱所爲熱盛之時必服冷藥冷藥多則動舊癖

因黃發痢後小便澀兼石淋候

黃病後小便澀兼石淋發黃疸此皆由蓄熱所爲熱流小腸小便澀少而痛下物如沙石也

因黃發吐候

黃病吐下之後胃氣虛冷其人宿病有寒飲故發吐

黃疸候

黃疸之病此由酒食過度府藏不和水穀相并積於脾胃復爲風濕所搏凝結不散熱氣鬱蒸故食已如飢令身體面目及爪甲小便盡黃而欲安卧若身體多赤黑多青皆見者必寒熱身痛面色微黃齒垢黃瓜甲上黃黃疸也渴而疸者其病難治疸而不渴其病可治發於陰部其人必嘔發於陽

部其人振寒而微熱

酒疸候

夫虛勞之人若飲酒多進穀少者則胃內生熱因大醉當風入水則身目發黃心中懊痛足脛滿小便黃面發赤班若下之久久變爲黑疸面目黑心中如噉蒜齏狀大便正黑皮膚瓜之不仁其脉浮弱故知酒疸心中熱欲嘔者當吐之則愈其小便不利其候當心中熱足下熱是其候證明也脉浮先吐之沈弦先下之

穀疸候

穀疸之狀食畢頭眩心忪怫鬱不安而發黃由失飢大食胃氣衝熏所致陽明病脉遲食難因飽飲者則發煩頭眩者必小便難此欲爲穀疸雖下之其腹必滿其脉遲故也

女勞疸候

女勞疸之狀身目皆黃發熱惡寒小腹滿急小便難由大勞大熱而交接交接竟入水所致也

黑疸候

黑疸之狀若小腹滿身體盡黃額上反黑足下熱大便黑是大黃疸酒疸女勞疸又又多變爲黑疸

九疸候

夫九疸者一曰胃疸二曰心疸三曰腎疸四曰腸  
疸五曰膏疸六曰舌疸七曰體疸八曰肉疸九曰  
肝疸凡諸疸病皆由飲食過度醉酒勞傷脾胃有  
瘀熱所致其病身面皆發黃但立名不同耳

胞疸候

胞疸之病小腸有熱流於胞內故大小便皆如菜  
汁此爲胞疸

風黃疸候

夫風濕在於府藏與熱氣相搏便發於黃即小便

或走

疸候

白好卧而心振面虛黑名爲風黃疸

濕疸者脾胃有熱與濕氣相搏故病苦身體疼  
面目黃小便不利此爲濕疸

冷熱病諸候

凡七論

病熱候

夫患熱者皆由血氣有虛實邪在脾胃陽氣有餘  
陰氣不足則風邪不得宣散因而生熱熱搏於府  
藏故爲病熱也診其脉關上浮而數胃中有熱滑  
而疾者亦爲有熱弱者無胃氣是爲虛熱跗陽脉



數者胃中有熱熱則消穀引食踰陽脉竈而浮者其病難治若病者若發熱身體疼痛此為表有病其脉自當浮今脉反沈而遲故知難差其人不可得愈必當死以其病與脉相反故也其湯熨針石別有正方補養宣導今附於後

養生方導引法

偃卧合兩膝布兩足而生腰

口內氣振腹七息除壯熱疼痛通兩脛不隨

出之極令微氣人鼻中勿令鼻知除身中熱背痛  
之兩手却據仰頭向日以口內氣因而咽之數

十除熱身中傷死肌

客熱候

客熱者由人府藏不調生於虛熱客於上焦則胸  
滿生痰實口苦舌乾客於中焦則煩心悶滿不能  
下食客於下焦則大便難小便赤澀

冷熱候

夫虛邪在於內與衛氣相搏陰勝者則為寒真氣  
去去則虛虛則内生寒視其五宮色白為有寒診  
其脉遲則為寒緊則為寒滿遲為寒微者為寒遲  
而緩為寒微而緊為寒寸口虛為寒其湯熨針石

別有正方補養宣導今附於後

**養生勿導引云**

一足向下踏地一足長舒向前

極勢手掌四方取勢左右換易四七去腸冷腰脊  
急悶骨疼令使血氣上下布潤又云兩足相合兩  
手仰捉兩脚向上急挽頭向後振勢極三七欲得  
努足手兩向舒張身手足極勢二七去竅中生百  
病下部虛冷

**又**跌兩手反向拓席漸漸向後努齊腹向前  
散氣待火急還放來去二七去齊下冷脚疼五藏  
六府不和

**又云**兩手向後拓腰覺膈極勢左右轉身來去三

七去腹肚齊冷兩膈急胸掖不和

**又云**牙腕兩手向後手掌合地出氣向下始漸漸  
向下覺腰脊大悶還上來去二七身正左右散氣  
膈腰三七去齊下冷解豁內疼痛

寒熱候

夫陽虛則外寒陰虛則內熱陽盛則外熱陰盛則  
內寒陽者受氣於上焦以溫皮膚分肉之間令寒  
氣在外則上焦不通不通則寒獨留於外故寒慄  
也陰虛內生熱者有所勞倦形氣衰少殺氣不盛

上焦不行下脘不通胃氣熱熏胸中故內熱也陽盛而外熱者上焦不通利皮膚緻密腠理閉塞不通衛氣不得泄越故外熱也陰盛而內寒者厥氣上逆寒氣積於胸中而不寫不寫則溫氣去寒獨留則血澁泣血澁泣則脈不通其脈不通則盛大以瀆故陰陽之要陰密陽固若兩者不和若春無秋若冬無夏因而和之是謂聖度故陽強不能陰氣乃絕因於露風乃生寒熱凡小骨弱肉者善病寒熱骨寒熱病無所安汗注不休齒本槁取其少陰於陰股之絡齒爪槁死不治診其脈沈細數

散也

寒熱往來候

夫寒氣並於陰則發寒陽氣並於陽則發熱陰陽二氣虛實不調故邪氣更作寒熱往來也脈緊而數寒熱俱發必當上乃愈脈急如絃者邪入陽明寒熱脾脈小甚爲寒熱

**養生方**云已醉飽食發寒熱也

冷熱不調候

夫人榮衛不調致令陰陽否塞陽並於上則上熱陰並於下則下冷上焦有熱或喉口生瘡胸滿煩



滿下焦有冷則腹脹腸鳴絞痛泄痢

寒熱厥候

夫厥者逆也謂陰陽二氣卒有衰絕逆於常度若陽氣衰於下則爲寒厥陰氣衰於下則爲熱厥熱厥之爲熱也必起於足下者陽起於五指之表集於足下而聚於足心故也故陽勝則足下熱熱厥者酒入於胃則絡脉滿而經脉虛脾主爲胃行其津液陰氣虛則陽氣入陽氣入則胃不和胃不和則精氣竭精氣竭則不營其四支此人必數醉若飽已入房氣聚於脾中未得散酒氣與穀氣相并

熱起於內故遍於身內熱則尿赤夫酒氣盛而慄悍腎氣有衰陽氣獨勝故手脚爲之熱寒厥之爲寒必從五指始上於膝下陰氣起於五指之裏集於膝下聚於膝上故陰氣勝則五指至膝上寒其寒也不從外皆從內寒寒厥何失而然陰者宗筋之所聚太陰陽明之所合也春夏則陽氣多而陰氣衰秋冬陰氣盛而陽氣衰此人者質壯以秋冬奪其所用下氣上爭未能復精氣溢下邪氣因從之而上氣因於中陽氣衰不能添榮其經絡故陽氣日損陰氣獨旺故手足爲之寒夫厥者或令人

腹滿或令人暴不知人或半日遠至一日乃知人者此由陰氣盛於上則下氣重上而邪氣逆逆則陽氣亂亂則不知人太陽之厥踵首頭重足不能行發爲胸仆陽明之厥則癩疾欲走則呼腹滿不卧卧則面赤而熱妄見妄言少陽之厥則暴聾頰腫胸熱脇痛鼈此不可以運太陰之厥腹滿臌脹後不利以不欲食食之則嘔不得卧也少陰之厥者則舌乾尿赤腹滿心痛厥陰之厥者少腹腫痛臌脹不利好卧屈膝陰縮腫脛外熱其湯熨針石別有正方補養宣導今附於後